

որի առջեւ փախչում են կեանք եւ մարդ :

Ու այստեղ, մեծ աւերումների այս երկրի մէջ, կատաղի եւ հրարխային ճեղքումների, անդնդառայց լանջքերի այս վայրերում, ի՞նչ խիտա եւ կարուկ խօսքեր է արտասանում բնութիւնը եւ ս՛րբախի քանդուած երազների եւ մեծագործը պօէմաների հեաքեր է պահում իր կոտորած եւ սլացիկ դժերի մէջ :

Մեր լեզուն տարօրինակօրէն նմանում է մեր գաղտանկարին : Կաւայի շերտեր, քարի, սպակիլի եւ երկաթի հետ խառնուած : Պղինձ, քիմիական կծու բաղադրութիւններ եւ ժայռ : Ու յանկարծ՝ ցած, աղքատիկ բուսականութեան մէջ թաքնուած՝ հարբեցուցիչ, բուրումնաւէտ այնպիսի խոտեր, որոնց ներկայութիւնը երբեք չէիր կարող երագել :

— Արովեանի անտաշ եւ հմայիչ բարբուռ :

— Եթէ ուզում էք... Յամենայն դէպս կարելի է ուրանալ, որ արդէ մեր գրականութեան նախահայրը իր մէջ պարունակում է հրարխային եւ տարերային այն շեշտը, որը միակ հարազատն է : Բաւական է դիտել մեր շուրջը՝ այդ ըմբռնելու համար :

— Տեսէ՛ք այդ լեռը :

— Լերկ, մերկ, մութ գոյնով, խստադէմ, եւ, սակայն, աջ կողքից իջնող գիծը ի՞նչ մեծ զգուշութեամբ, գրեթէ փափկութեամբ վար է սահում դէպի դաշտը, գրկում մի քանի բլրակներ եւ մեղմօրէն տարածւում դէպի հարա :

— Փսկ ձա՞խ կողքից :

— Ձախ կողքից կանակը դէմ է տալիս պարագին եւ, որովհետեւ յենարան չի գտնում, փլչում է, կտոր կտոր վայր ընկնում, շուրջը գտնուողներին տակնուվրայ անում եւ արագընթաց եռանկիւնիով մխրձուում է գետնի մէջ : Ո՞վ պիտի կարողանայ մի օր մեր լեզուի թաքնուած խորհուրդը երկրաբանական կազմութեան անսակչողով ուսումնասիրել, եւ ո՞վ պիտի կարողանայ մեր երկրի երկրաբանական կազմութիւնը մեր լեզուի եւ մեր հոգու խորհրդներով լուսաբանել :

— Fiat-ը այս ճանապարհի վրայ 40 վերստից աւելի չի կարող վազել ու դա էլ...

— Ինչպէս մեր լեզուն իր մէջ պարունա-

կում է սեփական առասպելներ եւ մեծղի դիւցազներգութիւններ, պատրաստ երգի վերածուելու եւ հոյակապօրէն ծաղկելու մեծ վերակոչողի սրտի մէջ, այդպէս նաեւ մեր երկիրը իր խորքի մէջ պահում է արտաքին գոյացման շեքսպիրեան իր ձեւը : Դաշտանկարների նախակեանքը դրոշմուած է նիւթի մէջ, ու երկար տարիների ճիգերով միայն մարդը կարող է յայտնաբերել ու դուրս ժայթքեցնել նրա խոր էութիւնը :

— Մեծ բան է, եթէ նկատի ունենանք մեր ճանապարհների գրութիւնը :

— Խմբագիրը եւ ուրիշներ, որ գալիս են հին մի մեքենայով, արդէն երկրորդ անգամն է կանգ են առնում եւ փորը դետնին տուած ինքնաշարժի տակը պրպտում :

— Այդ ամէնը դեռ ոչինչ. ես զարմանում եմ՝ ինչպէ՞ս են կարողացել այս նեղլիկ գառիվարների եւ գառիվերների վրայով հրել նաւը :

— Նա՞ւր :

— Նա՛ւր : Այն նաւը, որը մեզ սպառում է Սեւանայ լճի վրայ :

— Տարօրինակ է, Սեւանայ լճի բոլոր նաւերն էլ սրտառուչ պատմութիւններ ունեն : Ես երբեք չպիտի մոռանամ...

— Դաշնակցականները մեկնել էին եւ Երեւանի կայարանում, վազոնի վրայ ցցուած, թողել էին մի նաւ :

— Բեսարաբիացի մի հային, որը 19-ին եկել էր Հայաստան իր միակ զաւակի հետ :

— Բաւականի մեծ, երկաթէ այդ նաւը, ամիսներով մնացել էր թառած, չոգեմեքենաների մօտ, ափը ընկած տարօրինակ ծովային մի ձուկի նման : Մերամաղձոտ բան է ցամաքի վրայ նաւ տեսնելը : Խորտակուած երազի նրման, ծխնելոյցը վեր անկած, որք այդ թըռչունը, թեւերը ծալել նստել էր բուք ու բուրանի տակ, աչքերը տնկած անյայտ մի ճակատագրի առջեւ : Այդպէս ամիսներով...

— Բեսարաբիացի մի հա՞յ :

— Այո՛, եկել էր իբրեւ այնտեղի հայութեան պատգամաւոր : Յիսունի մօտ մի մարդ, հայերէնը խօսում էր դժուարութեամբ, ուսական շեշտով : Աչքերը փայլում էին, ոգեւորուած էր հայրենիքով, մեծ ծրագիրներ էր անում : Ասում էր, որ Բեսարաբիայում 60,000